


**ԱՆՁԻ ՀՈԳԵԲԱՆՈՒԹՅԱՆ**  
**ՏԵՍԱԿԱՆ ԵՎ ԿԻՐԱՌԱԿԱՆ ՀԱՐՑԵՐ**  
(գիտական հոդվածների ժողովածու)



**ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆ**

**ԱՆՁԻ ՀՈԳԵԲԱՆՈՒԹՅԱՆ  
ՏԵՍԱԿԱՆ ԵՎ ԿԻՐԱՌԱԿԱՆ ՀԱՐՑԵՐ**

(գիտական հոդվածների ժողովածու)

Երևան  
«ԱՍՈՂԻԿ»  
2016

ՀՏԴ 159.923  
ԳՄԴ 88.37  
Ա 597

*Հրատարակվում է Երևանի պետական համալսարանի  
փիլիսոփայության և հոգեբանության ֆակուլտետի  
գիտական խորհրդի երաշխավորմամբ*

Գրախոս՝  
հոգեբանական գիտությունների դոկտոր  
ՌՈՒԲԵՆ ՆԱՂԴՅԱՆ

Գիտական խմբագիր՝  
հոգեբանական գիտությունների թեկնածու  
ՆԱՐԻՆԵ ԽԱԶԱՏՐՅԱՆ

**Անձի հոգեբանության տեսական և կիրառական հարցեր** (գիտական  
Ա 597 հոդվածների ժողովածու). - Եր.: «Ասողիկ» հրատ., 2016.- 280 էջ:

Սույն ժողովածուում ներկայացված են ԵՊՀ Անձի հոգեբանության ամբիոնի դասախոսների, ասպիրանտների և մագիստրոսների հոդվածները: Ժողովածուում ընդգրկվել են անձի հոգեբանության հիմնահարցերին վերաբերող տեսական և կիրառական բնույթի հոդվածներ: Դիտարկվում են անձի ձևավորման և կայացման գործում զարգացման, սոցիալական, մշակութային և էքզիստենցիալ խնդիրներ:

Հոդվածների ժողովածուն կարող է օգտակար լինել անձի հոգեբանության ոլորտով հետաքրքրված մասնագետների և ուսանողների համար:

ՀՏԴ 159.923  
ԳՄԴ 88.37

ISBN 978-9939-50-308-0

© Երևանի պետական համալսարան, 2016  
© Խաչատրյան Ն. (խմբ.), 2016

# ԲՈՎԱՆԴԱԿՈՒԹՅՈՒՆ

ԱՌԱՋԱԲԱՆ..... 5

## ԱՆՁԻ ՀՈԳԵԲԱՆՈՒԹՅԱՆ ՆՈՐ ԿՈՂՄՆՈՐՈՇՈՒՄՆԵՐ

### *Նարինե Խաչապրյան*

ԱՆՁԻ ՀՈԳԵԲԱՆՈՒԹՅՈՒՆՆ ԸՅՍՕՐ. ՈՒՍՈՒՄՆԱՍԻՐՄԱՆ ԱՌԱՐԿԱՆ ԵՎ ՄԱՐՏԱՀՐԱՎԵՐՆԵՐԸ..... 9

### *Սվեդրյանա Հարությունյան*

ՆԱՐԱՏԻՎ ՀՈԳԵԲԱՆՈՒԹՅՈՒՆ. ՁԵՎԱՎՈՐՄԱՆ ՀԻՄՔԵՐԸ, ՄԵԹՈԴԱԲԱՆՈՒԹՅՈՒՆԸ ԵՎ ԿԻՐԱՌԱԿԱՆ ՆՇԱՆԱԿՈՒԹՅՈՒՆԸ .....16

## ԱՆՁ ԵՎ ԶԱՐԳԱՑՄԱՆ ԽՆԴԻՐՆԵՐ

### *Լիլիթ Գարգրյան*

ՍԵՓԱԿԱՆ ՏԱՐԻՔԻ ԸՆԿԱԼՈՒՄՆ ՈՒ ԴՐԱ ՆԿԱՏՄԱՄԲ ՎԵՐԱԲԵՐՄՈՒՆԻՔԸ ՀԱՍՈՒՆՈՒԹՅԱՆ ՓՈՒԼՈՒՄ ..... 33

### *Իրինա Խանամիրյան*

ԾՆՈՂԱԿԱՆ ՀՐԱՀԱՆԳՆԵՐԻ ԱԶԴԵՑՈՒԹՅՈՒՆԸ ԿԱՆԱՑԻՈՒԹՅԱՆ ՁԵՎԱՎՈՐՄԱՆ ՎՐԱ..... 42

### *Էլենորա Զաքարյան, Մարինե Միքայելյան*

ՓՈԽՀԱՏՈՒՑՄԱՆ ԲԱԶՄԱԲՆՈՒՅԹ ՄԵԽԱՆԻԶՄՆԵՐԸ ԵՎ ԴՐԱՆՑ ԿԻՐԱՌԱԿԱՆ ՆՇԱՆԱԿՈՒԹՅՈՒՆԸ ՀԱՏՈՒԿ ԿԱՐԻՔՆԵՐ ՈՒՆԵՑՈՂ ԵՐԵԽԱՆԵՐԻ ԶԱՐԳԱՑՄԱՆ ԳՈՐԾՈՒՄ ..... 49

### *Սոսե Խաչիբաբյան*

ՍՏԵՂԾԱՐԱՐՈՒԹՅԱՆ ԶԱՐԳԱՑՄԱՆ ԳՈՐԾՈՆՆԵՐԸ ԿՐՏՍԵՐ ԴՊՐՈՑԱԿԱՆ ՏԱՐԻՔՈՒՄ .....61

### *Մանե Տոնոյան*

ԾԵՐՈՒԹՅԱՆ ՎԵՐԱԲԵՐՅԱԼ ՊԱՏԿԵՐԱՑՈՒՄՆԵՐԸ ՄԻՋԻՆ ՀԱՍՈՒՆՈՒԹՅԱՆ ՓՈՒԼՈՒՄ ..... 68

### *Կարինե Հարությունյան*

ՆԿԱՐԻ ԴԵՐԸ ԵՎ ՊԱՏԿԵՐՄԱՆ ԱՌԱՆՁՆԱՀԱՏԿՈՒԹՅՈՒՆՆԵՐԸ ՄԱՆԿՈՒԹՅԱՆ ՇՐՋԱՆՈՒՄ ..... 77

### *Արմինե Հայրապետյան, Լիլիթ Գարգրյան*

ԿԱՊՎԱԾՈՒԹՅԱՆ ՏԵՍԱԿԻ ԵՎ ՀՈԳԵԲԱՆԱԿԱՆ ԲԱՐԵԿԵՑՈՒԹՅԱՆ ՓՈԽԿԱՊՎԱԾՈՒԹՅՈՒՆԸ ԵՐԻՏԱՍԱՐԴՈՒԹՅԱՆ ՏԱՐԻՔՈՒՄ..... 84

## ԱՆՁ ԵՎ ՍՈՑԻԱԼԱԿԱՆ ԽՆԴԻՐՆԵՐ

### *Աննա Հակոբջանյան*

ԱՌՈՂՋՈՒԹՅԱՆ ՊԱՀՊԱՆՄԱՆՆ ՈՒՂՂՎԱԾ ՎԱՐՔԻ ՈՒՍՈՒՄՆԱՍԻՐՄԱՆ ՄՈՏԵՑՈՒՄՆԵՐԸ ..... 97

### *Լիանա Սարգսյան, Սվեդրյանա Հարությունյան*

ԵՐԻՏԱՍԱՐԴՆԵՐԻ ԱՐԺԵՔԱՅԻՆ ԿՈՂՄՆՈՐՈՇԻՉՆԵՐԻ ԵՎ ՏՆՏԵՍԱԿԱՆ ԻՆՔՆՈՒԹՅԱՆ ՓՈԽԿԱՊՎԱԾՈՒԹՅԱՆ ԱՌԱՆՁՆԱՀԱՏԿՈՒԹՅՈՒՆՆԵՐԸ .....113

***Լիլիթ Ավերիսյան, Սոնա Մանուսյան***

ԿԱՄԱՎՈՐԻ ՕԳՆՈՂԱԿԱՆ ԴԻՐՔՈՐՈՇՈՒՄՆԵՐՆ ԱՆՁԻ  
ՆՈՒՅՆԱԿԱՆՈՒԹՅԱՆ ԿԱՌՈՒՅՎԱԾՔՈՒՄ ..... 128

***Քնարիկ Առաքելյան***

ԱՆՁԻ ՁՈՎԱՅՆՈՒԹՅՈՒՆԸ ՈՐՊԵՍ  
ՄԻՋԱՌԱՐԿԱՅԱԿԱՆ ՈՒՍՈՒՄՆԱՍԻՐՈՒԹՅԱՆ ՀԻՄՆԱԽՆԴԻՐ..... 145

***Մարիաննա Գևորգյան, Նարինե Խաչատրյան***

ՍՈՒԲՅԵԿՏԻՎ ԲԱՐԵԿԵՑՈՒԹՅՈՒՆԸ ԵՎ ԱՅՆ ՊԱՅՄԱՆԱՎՈՐՈՂ  
ԳՈՐԾՈՆՆԵՐԻ ԱՌԱՆՁՆԱՀԱՏԿՈՒԹՅՈՒՆՆԵՐԸ ԵՐԻՏԱՍԱՐԴՆԵՐԻ  
ՇՐՋԱՆՈՒՄ..... 153

***Անժելա Աֆյան, Նարինե Խաչատրյան***

ԵՐԻՏԱՍԱՐԴՆԵՐԻ ԱՇԽԱՏԱՆՔԱՅԻՆ ՎԱՐՔԻ ՌԱԶՄԱՎԱՐՈՒ-  
ԹՅՈՒՆՆԵՐԻ ԸՆՏՐՈՒԹՅԱՆ ԱՌԱՆՁՆԱՀԱՏԿՈՒԹՅՈՒՆՆԵՐԸ ..... 163

**ԱՆՁ ԵՎ ՄՇԱԿՈՒԹԱՅԻՆ ԽՆԴԻՐՆԵՐ**

***Սոնա Մանուսյան***

ԱԶԳԱՅԻՆ ԻՆՔՆՈՒԹՅԱՆ ՍՈՑԻԱԼ-ՀՈԳԵԲԱՆԱԿԱՆ  
ԸՄԲՈՒՆՈՒՄԸ..... 179

***Նվարդ Գրիգորյան, Աննա Հակոբջանյան, Մերի Գրիգորյան***

ԺՈՂՈՎՐԴԱԿԱՆ ԱՍԱՅՎԱԾՔՆԵՐԸ ՈՐՊԵՍ ՀԱՄՈՂՄՈՒՆՔՆԵՐԻ  
ՁԵՎԱՎՈՐՄԱՆ ՀԻՄՔԵՐ..... 193

***Ասպրիկ Սերոբյան***

ԱՆՁՆԱՅԻՆ ԳԾԵՐ ԵՎ ԱՌԻՏՈԿԱՐԾՐԱՏԻՊԵՐ. ՀԱՄԵՄԱՏԱԿԱՆ  
ՈՒՍՈՒՄՆԱՍԻՐՈՒԹՅՈՒՆ ՀԱՅԵՐԻ, ՀՈՒՅՆԵՐԻ ԵՎ ԱՍՈՐԻՆԵՐԻ  
ՕՐԻՆԱԿՈՎ..... 210

***Անուշ Մկրտչյան***

ԱՐԺԵՔՆԵՐԻ ՈՒՍՈՒՄՆԱՍԻՐՄԱՆ ՏԵՍԱԿԱՆ ԵՎ ԿԻՐԱՌԱԿԱՆ  
ԱՍՊԵԿՏՆԵՐԸ..... 227

***Անի Մովսիսյան, Նարինե Խաչատրյան***

ՈՐՈՇ ԱՆՁՆԱՅԻՆ ՓՈՓՈԽԱԿԱՆՆԵՐԻ ՀԱՄԵՄԱՏԱԿԱՆ  
ՎԵՐԼՈՒԾՈՒԹՅՈՒՆ ՏԱՐԲԵՐ ՄՇԱԿՈՒՅԹՆԵՐՈՒՄ  
ՍՈՑԻԱԼԱԿԱՆԱՑՈՒՄ ԱՆՑԱԾ ՀԱՅ ԵՐԻՏԱՍԱՐԴՆԵՐԻ ՕՐԻՆԱԿՈՎ ..... 238

**ԱՆՁ ԵՎ ԷՔԶԻՍՏԵՆՑԻԱԼ ԽՆԴԻՐՆԵՐ**

***Լուսինե Աղաբեկյան***

ՄԱՀՎԱՆ ՀԵՏ ԲԱԽՈՒՄԸ՝ ՈՐՊԵՍ ԷՔԶԻՍՏԵՆՑԻԱԼ  
ՓՈՐՁԱՌՈՒԹՅՈՒՆ ..... 257

***Նարինե Աղամյան, Իրինա Խանամիրյան***

ԱՌՈՂՋԱԿԱՆ ԽՆԴԻՐՆԵՐ ՈՒՆԵՑՈՂ ԵՐԵԽԱՆԵՐԻ ՄԱՅՐԵՐԻ  
ԱՐԺԵՄԱՍՏԱՅԻՆ ՈԼՈՐՏԻ ԱՌԱՆՁՆԱՀԱՏԿՈՒԹՅՈՒՆՆԵՐԸ..... 263

***Կարինե Գրիգորյան***

ԵՐԵԽԱՆԵՐԻ ՄԱՀՎԱՆ ՎԱԽԻ ՖԵՆՈՄԵՆՈԼՈԳԻԱՆ. ՏԱՐԲԵՐ  
ՄՈՏԵՑՈՒՄՆԵՐ ԵՎ ՈՒՍՈՒՄՆԱՍԻՐՈՒԹՅՈՒՆՆԵՐ ..... 273

# ՆԿԱՐԻ ԴԵՐԸ ԵՎ ՊԱՏԿԵՐՄԱՆ ԱՌԱՆՁՆԱՀԱՏԿՈՒԹՅՈՒՆՆԵՐԸ ՄԱՆԿՈՒԹՅԱՆ ՇՐՋԱՆՈՒՄ

## *Կարինե Հարությունյան*

Ստեղծագործելն ինքնատիպ գործունեության տեսակ է, որի արդյունքում մարդը ստեղծում է նորը, յուրօրինակը, իրագործում է իր մտահղացումները: Վաղ մանկության շրջանում ստեղծագործության հիմնական տեսակը նկարն է, որը երեխայի ինքնարտահայտման հիմնական ձևերից է: Այն մանկության շրջանում երեխայի հաղորդակցման լեզուն է և աշխարհի արտացոլման գործիքը: Նկարն արտացոլում է երեխայի ներաշխարհը՝ կրելով կարևոր տեղեկատվություն հոգեվիճակի, հոգեկան գործընթացների, բնավորության, սոցիալական հարաբերությունների, երեխայի անձի և նրա շրջակա միջավայրի մասին: Ստեղծագործելու կարողությունը նկարի միջոցով դրսևորվում է՝ սկսած 1.5 տարեկանից, և անձի զարգացման կարևոր նախապայման է: Ստեղծագործելու պահանջումնքը բնորոշ է մարդ տեսակին և ժառանգվում է սերնդեսերունդ [5]:

Նկարը՝ որպես երեխայի գործունեության արդյունք, տարիքային մի շարք առանձնահատկություններ և գործընթացներ ուսումնասիրելու հիմնական աղբյուրն է: Հետազոտելով երեխաների նկարները՝ հոգեբան մասնագետները կարող են դուրս բերել երեխաների զարգացման տիրույթի, հետաքրքրությունների ոլորտի, տարիքային առանձնահատկությունների և դրանց դրսևորման մասին տեղեկատվություն: Հաշվի առնելով վերոնշյալը՝ նկարը, որպես երեխայի հոգեկանի հայելի, եղել և մնում է հետազոտության առարկա, որի դերի, նշանակության, մեկնաբանման և տեղեկատվության ստացման հնարավորություններն անսահման են: Այսինքն՝ դեռևս պարզ չէ, թե նկարի կիրառման կամ մեկնաբանության չբացահայտված էլ ինչ հնարավորություններ գոյություն ունեն:

Սույն հոդվածում ուսումնասիրվում են նկարի պատկերման դերը, գործառույթները, ինչպես նաև մանկության շրջանի զարգացման ընթացքում տեղի ունեցող բոլոր հոգեբանական փոփոխությունները, որոնք արտացոլվում են նկարի միջոցով: Հիմք ընդունելով այն փաստը, որ երեխայի ինքնարտահայտման լեզուն ստեղծագործությունն է, իսկ նկարը երեխայի ստեղծագործական նախասկիզբն արտահայտելու ամենատարածված ձևերից է, ապա, ուսումնասիրելով նկարի պատկերման առանձնահատկությունները, կարելի է ուսումնասիրել նկարի պատկերման աստիճանական զարգացումը և բովանդակային օրինաչափությունները: Այս ամենը

հնարավորություն է ընձեռում հետևել մտածողության, երևակայության, ինքնագիտակցության զարգացմանը մանկության շրջանում, ինչպես նաև դուրս բերել զարգացման ոլորտի հավելյալ չափորոշիչներ:

Դեռևս չունենալով խոսքային հաղորդակցման զարգացած հմտություններ՝ երեխան նկարի միջոցով պատմում է իր համար նշանակալի երևույթների, հասկացությունների, ապրումների մասին, արտահայտում իր հույզերը, ներկայացնում արդիական խնդիրները, ճանաչում ինքն իրեն և աշխարհը: Ստեղծագործելու բնածին պահանջմունքը վաղ մանկության շրջանում առավել հաճախ արտահայտվում է նկարչությամբ [3]:

Այդ է պատճառը, որ երեխաներն իրենց ունեցած հնարավոր նյութերով ստեղծում են անկանոն պատկերներ՝ հաճախ նկարելով սենյակի պատերի, հատակի կամ հագուստի վրա: Մեծահասակները չեն սովորեցնում երեխաներին նկարել, վերջիններս ինքնաբուխ վերցնում են մատիտը կամ գրիչը և անկանոն շարժումներով պատկերներ ստեղծում:

Նկարը և նկարի պատկերումը կարևոր դեր են կատարում երեխայի զարգացման և կայացման գործում: Չնայած գիտական գրականության աղբյուրներում չի հանդիպում «նկարի գործառույթ» հասկացությունը, այնուամենայնիվ, դրա կարևորությունն ու նշանակությունն առավել ճշգրիտ արտացոլելու նպատակով մենք այն պայմանականորեն կանվանենք գործառույթ: Նախևառաջ, նկարն ինքնարտահայտման հիմնական ձևերից է, որի ընթացքում երեխան հաճույք է ստանում բուն ստեղծագործական գործընթացից, նկարչական նյութի հետ հարաբերվելուց, որտեղ ճանաչողական ակտիվության կենտրոնում են նյութի գույնը, որակը, հոտը և այլն: Վաղ շրջանում երեխաները կենտրոնացած չեն գործունեության վերջնարդյունքի վրա. մեծանալուն զուգընթաց՝ կարևորվում է ստեղծագործության գեղագիտական բաղադրիչը, որտեղ տարբերակվում են գեղեցիկը և տգեղը, ճիշտը և սխալը:

Նկարի հաջորդ կարևոր գործառույթը ճանաչողականն է: Համարվում է, որ ամեն երեխա զարգացման որոշակի փուլում նախապես ձգտում է աշխարհի մասին իր գիտելիքները դասակարգել, ապա ընդհանրացնել, հետևաբար՝ նկարչությունն ինքնարտահայտման պահանջմունքը բավարարելուց բացի՝ ծառայում է նաև որպես աշխարհի ճանաչման գործիք: Թղթի վրա մոդելավորելով օբյեկտիվ իրականության հասկացություններն ու առարկաները՝ երեխան դրանց միջև նոր կապեր է գտնում: Նկարի բովանդակություն կարող են դառնալ շրջակա միջավայրի օբյեկտները, իրական, երևակայական հերոսներն ու կերպարները, նշանակալի անձինք և այլն [2]:

Նկարը տարիքային զարգացման վաղ շրջանում իրականացնում է մեկ այլ կարևոր՝ զարգացնող գործառույթ: Ինչպես հայտնի է,

երեխաների մտածողությունը հիմնվում է սխեմաների վրա, հետևաբար՝ երեխան հակված է նկարել իրերը, դրանց կիրառման առանձնահատկությունները և նշանակալի կողմերը: Այդ փաստն անմիջապես կապված է էվոլյուցիոն զարգացման և ինքնապահպանման բնագրի հետ, քանի որ մարդը, ապրելով մեծ ցեղախմբում, ստիպված է եղել հարմարվել և զարգանալ արտաքին պայմաններին համապատասխան, և այստեղ նկարը ծառայել է որպես տեղեկատվության փոխանցման և հաղորդակցման միջոց: Դիտարկելով երեխայի կյանքի առաջին երկու տարիների կենսաբանական և ֆիզիոլոգիական զարգացման առանձնահատկությունները՝ պարզ է դառնում, որ մինչև 1.5-2 տարեկան երեխան սիմբիոտիկ կապի մեջ է մայրական օրգանիզմի հետ: Վերջինս հոգում է երեխայի բոլոր պահանջմունքները, հետևաբար՝ երեխան կարիք չունի պատկերելու համընդհանուր ճանաչելի պատկերներ [7]: Նպաստավոր պայմաններում մեծանալուն զուգընթաց՝ երեխան կարողանում է նկարել օբյեկտիվ իրականությանը համապատասխանող պատկերներ. զարգանում է պատկերավոր մտածողությունը: Բացի այդ, նկարչությունը խթանում է նաև երեխայի հուզական ոլորտի, մտածողության, հիշողության, երևակայության և մանր մոտորիկայի զարգացումը:

Այս գործընթացում կարևորվում է մեծահասակի դերը, քանի որ արտաքին միջավայրի նպաստավոր պայմանները, ստեղծագործական ուղղվածությունը և խրախուսումը դրական միջավայր են հանդիսանում զարգացման համար:

Մեծանալուն զուգընթաց՝ նկարի պատկերումն անցնում է մի շարք փուլերով: Յուրաքանչյուր տարիքային փուլ ունի իր ուրույն հոգեֆիզիոլոգիական առանձնահատկությունները, որոնք արտահայտվում են նկարի ստեղծման գործընթացում: Մի շարք տեսաբաններ անդրադարձել են այդ առանձնահատկությունների ուսումնասիրությանը և դուրս են բերել որոշակի օրինաչափություններ [1]:

Համադրելով և ընդհանրացնելով տարբեր հեղինակների առաջադրած նկարի պատկերման օրինաչափություններն ըստ տարիքային փուլերի՝ առանձնացնում ենք հետևյալ փուլերը. նկարի արարման առաջին փուլը համարվում են մատի, մատիտի, գրչի և նկարչական այլ նյութերի գրաֆիկական հետքերն ու խզբզոցները թղթի մակերեսին: Առաջին տարվա ավարտին երեխան արդեն անկանոն շարժումներ է կատարում և խզբզում է:

1-2 տարեկանում, երեխայի զարգացմանը զուգընթաց, աստիճանաբար կարգավորվում են նրա տեսողական-շարժողական ընկալիչի աշխատանքը, շարժումների հավասարակշռությունը: Արդյունքում՝ աչքերը սովորում են հետևել ձեռքի գրաֆիկական շարժմանը: Մի շարք գիտնականներ հետազոտել են այս տարիքի նկարների առանձնահատկությունները:



Առավել ուշագրավ է Ռոդա Կելոգի (Rhoda Kellogg, 1970) հետազոտությունը, որի ընթացքում ուսումնասիրվել է ավելի քան մեկ միլիոն նկար, արդյունքում պարզ է դարձել, որ դրանք որոշակի էվոլյուցիայի են ենթարկվում թանաքահետքերից մինչև բարդ խորհրդանշանային պատկերներ: Հետազոտությունների արդյունքում ապացուցվել է, որ 2 տարեկան երեխաների նկարներն աննպատակ չեն. դուրս է բերվել տարիքին բնորոշ խզբզանքների մոտ 20 տեսակ: Բոլոր այդ կետերը, գծերը և շրջաններն արտացոլում են մկանային առանձին շարժումներ: Ռ. Կելոգի վարկածի համաձայն՝ յուրաքանչյուր երեխա կարող է նկարել այդ 20 ձևի նշանները, իսկ դրանց վերարտադրման անընդունակությունը կարող է վկայել մի շարք խանգարումների առկայության մասին, որոնք դեռևս նկատելի չեն վաղ շրջանի տարիքային առանձնահատկությունների պատճառով: Վերոհիշյալ 20 պատկերները հիմնարար են երեխաների նկարներում, քանի որ բարդ ստեղծագործական աշխատանքների հիմք են հանդիսանում զարգացման ավելի ուշ փուլերում [մեջբերվում է ըստ 4]:

2-2.5 տարեկանից սկսած՝ երեխան սկսում է գիտակցել, որ թուղթն ունի որոշակի եզրեր և սահմաններ. Արդյունքում՝ նա աշխատում է չանցնել այդ սահմանները: 2.5-3 տարեկան հասակում երեխայի ստեղծագործական գործունեությունը կենտրոնացած է առարկայական աշխարհի վրա: Այդ փուլին բնորոշ բացահայտում է պատկերների հայտնաբերումը սեփական ստեղծագործության մեջ: Այսպիսով, երեխաներն ակտիվորեն սկսում են իրենց նկարների մեջ փնտրել զանազան օբյեկտներ, սակայն նրանց ասոցիատիվ մտածողությունը դեռևս զարգացած չէ, հետևաբար ժամանակի տարբեր պահերին միևնույն պատկերը կարող է զուգորդվել մի քանի տարբեր առարկաների հետ: Նման զուգորդումների արդյունքում բացահայտվում և ի հայտ է գալիս նկարչության նշանային դերը: Պատկերների խորհրդանշանային լեզուն երեխայի համար դառնում է իմաստալից [նույն տեղում]: Արդյունքում՝ իրականացվում են մարդ, կենդանի, բնություն նկարելու առաջին փորձերը, որտեղ կարևոր չէ պատկերների գեղագիտական նշանակությունը: Սկզբունքային է, որ երեխան արդեն կարող է խոսել և արտահայտվել այդ լեզվով:

Գիտակցության նշանային կամ խորհրդանշանային գործառույթը սկսում է ձևավորվել մոտավորապես 3 տարեկանում, երբ երեխան կարող է հետազոտել օբյեկտները և գտնել դրանց փոխարինողը՝ խաղային գործընթացում կիրառելու համար: Աստիճանաբար նշանային համակարգը ստանում է բառային իմաստ և արտահայտվում խոսքի միջոցով: Արդյունքում՝ երեխան սեփական խզբզոցների մեջ սկսում է տեսնել, տարբերակել և անուն տալ առարկաներին ու պատկերներին: Այդ պահից սկսած՝ նա ակտիվորեն

նմանություններ է փնտրում իր պատկերած գծերի, կետերի, դրանց համադրությունների և իրեն արդեն ծանոթ պատկերների միջև, որոնք բնութագրվում են կոնկրետ չափանիշներով և սահմանափակում են օբյեկտների դասակարգման տիրույթը: Նախադպրոցական տարիքում մտածողության համադրության և համեմատության գործառույթն ունի սահմանափակ թվով չափորոշիչներ, հետևաբար՝ երեխայի համար անսովոր ձևով պատկերված ծանոթ օբյեկտին կարող են տրվել տարբեր մեկնաբանություններ: Հիմնականում ոչ տիպիկ և անսովոր պատկերները երեխայի կողմից անվանվում են սխալ: Այդ պատճառով համարվում է, որ նշանային համակարգը ոչ թե բացահայտվում, այլ աստիճանաբար յուրացվում է:

Այս շրջանում երեխան ակտիվորեն սկսում է կիրառել ոչ միայն ակնառու իրերը, այլև փորձում է գտնել դրանց փոխարինողներ: Մտածողությունը ակնառու-գործնականից փոխակերպվում է ակնառու-պատկերավորի: Որոշակի նշանակություն տալով այս կամ այն իրին՝ երեխան սկսում է տիրապետել նաև խոսքային նշանային համակարգին, որի ձևավորմանը նպաստում են նկարչությունը, խաղը և շփումը մեծահասակների հետ [2]:

Այս տարիքային փուլին բնորոշ է նաև երեխայի նկարներում արտացոլվող մեկ այլ կարևոր առանձնահատկություն. խոսքը վերաբերում է հաճախ հանդիպող և առաջին հայացքից անիմաստ, անհասկանալի թվացող մատնահետքերին, թանաքաբծերին ու պատկերներին, որոնք երեխայի համար իր գոյությունը և ներկայությունը փաստող հիմքեր են: Հաշվի առնելով, որ այս փուլում ձևավորվում են երեխայի Ես-ը և ինքնագիտակցությունը, պարզ է դառնում նրա նկարելու և մատնահետքեր թողնելու գերակշռող ցանկության պատճառը:

3-4 տարեկանում երեխան ընկալում է թուղթը որպես աշխարհի տարածություն, որը պետք է կառուցվի համապատասխան ձևով, և որտեղ կարելի է բնակեցնել տարբեր հերոսների. նրանց ոտքերի տակ պետք է լինի հողը, իսկ գլխավերևում՝ երկինքը: Այս փուլում հանդիպող հիմնական պատկերներն աշխարհը մոդելավորելու տարրական ձևերն են, երբ հիմնականում երեխաները նկարում են երկինք, արև, խոտ, տուն, ծառ, մարդ, կենդանի և այլն:

Աշխարհի ճանաչման տվյալ փուլում երեխան օգտագործում է ոչ միայն նկարը, այլև այն ամենն, ինչն ինքնարտահայտվելու և ստեղծագործելու հնարավորություն է ընձեռում տարածության մեջ՝ ավազե քանդակներ, գլուխկոտրուկներ, զանազան խաղեր [4]: Օրինակ, հիմնվելով ապերցեպցիայի վրա՝ երեխան կարող է թխվածքաբլիթը նմանեցնել որևէ կերպարի, փշրել, ապա փշրանքները զուգորդել կենդանիների կերպարների հետ և անուններ տալ դրանց: Նման ակտիվության արդյունքում երեխան աստիճանաբար կարողանում է դասակարգել իր գիտելիքները: Նա աշխատում է

այդ խնդրի շուրջ այն պահից ի վեր, երբ սկսում է տիրապետել լեզվին, որի շնորհիվ կարող է մոդելավորել աշխարհը՝ ստեղծելով դրա խորհրդանշանային փոխակերպումն իր կերտածի կամ նկարած նկարի միջոցով:

Սկսած 5 տարեկանից՝ ի հայտ են գալիս պրոֆիլային նկարները, որոնք հիմնականում շարժման և դինամիկայի ամբողջական ընկալման ցուցանիշներ են: Այսպիսով, երեխան յուրացնում է պատկերավոր լեզուն՝ որպես գլխավոր նշանային համակարգ, որի շնորհիվ նրա մեջ ձևավորվում է աշխարհի ամբողջական պատկերը:

Նախադպրոցական տարիքի հիմնական բնութագրիչներից է աշխարհի մասին սեփական պատկերացումների, ընդհանրացված գիտելիքների փոխանցումը թղթին: Նկարելով երեխան կարողանում է համապատասխան օրինաչափություններ և կապեր դուրս բերել, ինչն էլ նախադպրոցականի գիտելիքների համակարգման հիմնական աղբյուրներից է [5]:

Այս շրջանին բնորոշ մեկ այլ կարևոր առանձնահատկություն է օբյեկտների ինքնատիպ վերարտադրությունը: Երեխաները նկարում են առարկաները ոչ այնքան իրատեսական ոճով, որքան առանձնահատուկ ընդգծված և հիպերբոլացված. սովորաբար ընդգծվում է պատկերի այն հատվածը, որն ամենաշատն է գրավել իր ուշադրությունը: Հիմնականում այդ առանձնահատկությունը պայմանավորված է լինում տարիքին բնորոշ հուզական ընկալմամբ, մարմնահոգեկան կապի պարզությամբ: Արդյունքում՝ երեխաների նկարներն ավելի անմիջական են և հուզական: Օրինակ, երեխան կարող է պատկերել 2 մեծ անիվ, միացնել դրանք մեկ գծով և ասել, որ նկարում պատկերված է հայրիկի մեքենան:

Այս գործընթացում այնքան կարևոր չեն օբյեկտի արտաքին տեսքի առանձնահատկությունները, որքան երեխա-օբյեկտ փոխազդեցության համակարգը, որը հիմնվում է ապրումների և զգայաշարժական փորձի վրա, երբ այդ իրավիճակը ստանում է հուզական երանգավորում: Հետևաբար, երեխաների նկարներն այս շրջանում այնքան տեսա-առարկայական չեն, որքան հուզական [6]: Օրինակ, ընկնելու և ոտքը վնասելու արդյունքում ուժեղ վախի զգացում ունեցած երեխան նկարում է այդ տեսարանը՝ պատկերելով իրեն և ոտքից հոսող արյունը, որն ալիքաձև պատում է թղթի ողջ մակերեսը:

Զարգացմանը զուգընթաց՝ առարկաները դառնում են առավել իրատեսական և պարզ: Եթե մինչև 5 տարեկան երեխաների նկարներում գերակշռում են միանման պատկերվող, մեծահասակների սովորեցրած առանձին օբյեկտների պատկերները, ապա 6 տարեկանից սկսած՝ երեխան հաղթահարում է առաջնային կաղապարները և նկարում իր հետաքրքրության ոլորտում գտնվող բոլոր առարկաները: Այս շրջանում նա ոչ միայն պատրաստ է պատկերել առանձին առարկաներ և սյուժետային նկարներ,

այլև պատկերագարդել գրքեր, հեքիաթներ, դրվագներ իրական կյանքից: Իրական և երևակայական կյանքում հանդիպող յուրաքանչյուր երևույթ կարող է դառնալ երեխայի ստեղծագործության թեմա, հետևաբար՝ որքան զարգացած է ճանաչողական ակտիվությունն արտաքին միջավայրի հանդեպ, այնքան հարուստ և հագեցած են լինում երեխաների նկարները [2]:

Այսպիսով, նկարը երեխայի ստեղծագործական պահանջմունքը բավարարող հիմնական ձևն է, որը կարևոր դեր է կատարում երեխայի զարգացման գործում: Այն ունի ինքնարտահայտման, ճանաչողական և զարգացնող նշանակություն: Զարգացման յուրաքանչյուր փուլում երեխաների նկարները տարբերվում են մի շարք առանձնահատկություններով, որոնք պայմանավորված են հոգեբանական և ֆիզիոլոգիական բնութագրիչներով: Մանկական նկարը հնարավորություն է տալիս հետևել, թե ինչպես են առաջին թանաքաբծերն աստիճանաբար վերածվում պատկերների և սյուժետային նկարների՝ արտացոլելով երեխայի ձևավորման գործընթացը:

Նկարի պատկերման տարիքային օրինաչափությունները կարող են ուղեցույց հանդիսանալ հոգեբան մասնագետների համար: Նկարի որակական և բովանդակային փոփոխությունները թույլ են տալիս բացահայտել և ուսումնասիրել երեխայի հոգեկանի այնպիսի երևույթների ձևավորումն ու զարգացումը, ինչպիսիք են գիտակցության նշանային գործառույթը, խոսքը, ինքնագիտակցությունը, ընկալումը, մտածողությունը, շփումը և այլն: Վերոնշյալ բոլոր բաղադրիչներն առանձին ուսումնասիրության առարկա են, որտեղ անկախ նպատակից (տեղեկատվության հավաքագրում, ախտորոշում, շտկողական կամ թերապևտիկ աշխատանք) նկարի պատկերումը կարող է նոր հորիզոններ բացել ինչպես ուսումնադաստիարակչական, այնպես էլ զարգացնող և շտկողական աշխատանքների ոլորտներում:

## ԳՐԱԿԱՆՈՒԹՅՈՒՆ

1. **Венгер, А.** *Психологические рисуночные тесты: Иллюстрированное руководство*, М., Изд-во ВЛАДОС-ПРЕСС, 2003.
2. **Мухина, В.** *Детская психология*. М., Апрель Пресс, ЭКСМО-ПРЕСС, 2000.
3. **Оклендер, В.** *Окна в мир ребенка: Руководство по детской психотерапии*, М., Класс, 2003.
4. **Осорина, М.** *Секретный мир детей в пространстве мира взрослых*. СПб., «Питер», 1999.
5. **Пономарев, Я.** *Психология творчества*, Москва, «Наука», 1976.
6. **Фолькельт, Г.** *Целостные феномены в изобразительной деятельности детей. Экспериментальная психология дошкольника*. М., Л., Гос. изд. 1930, с. 113-119.
7. **Фирсов, Л., Чижиков, А.** *Очерки физиологической психологии*, СПб., «Астер-Х», 2003.